

Morning Regional Dogri News Bulletin, 24 July 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- खजाना मंत्री हुंदे आस्सेआ कल पेश कीते गेदे केंद्री बजट च जम्मू-कश्मीर गी 42 जहार 277 करोड़ 74 लकख रपे दी रकम अलॉट कीती गई ऐ।
- 2- उपराज्यपाल मनोज सिन्हा होरें बजट दी सराहना करदे होई आखेआ जे एहदे नै तरक्की गी रफतार थहोग।
- 3- सुप्रीम कोर्ट नै नीट-यूजी 2024 आले मतेयन गी रद्द करिए परतिए करोआने सवां ना करी दिती ऐ। डाक्टरी दी पढ़ाई लेई दाखले गितै काउंसलिंग अज्जै थमां शुरू।
- 4 उपराज्यपाल मनोज सिन्हा होरें समस्याएं दे नबेड़े ते निगरानी लेई 'समाधान' ना करने इक एकीकृत पोर्टल दी शुरूआत कीती।
- 5 महिलाएं दे टी-20 एशिया कप च भारत नै नेपाल गी 82 रन्ज कन्नै हराया ते सेमीफाइनल दी अपनी थाहर पक्की करी लैती।

<><><><><><>

J&K Budget

वित्त मंत्री निर्मला सीतारमण हुंदे आस्सेया पेश कीते गेदे केंद्री बजट च जम्मू-कश्मीर गी 42 जहार 277 करोड़ 74 लकख रपे दी रकम अलाट कीती गई ऐ जेहड़ी जे पिछले बरे दिते गेदे 41 जहार 751 करोड़ 44 लकख रपे दे बजट कोलां शड़ा 1 इशारिया 2 फीसद गै मता ऐ। केंद्रीय

खजाना मंत्री सीतारमण हुंदे आस्सेया कल लोकसभा च पेश कीते गेदे इस बजट च 40 जहार 119 करोड़ 30 लकख रपे दी रकम जम्मू-कश्मीर केंद्र शासित प्रदेश च संसाधनें दी कमी दी कसर गी पूरा करने लेई दिती गई ऐ। एहदे अलावा 279 करोड़ रपे यू.टी DRE यानि आपदा प्रतिक्रिया कोष दे रूपे च दिती गई ऐ जेहड़ी कुदरती कुरोपिएं दी सूरतै च खर्चे लेई ऐ। बजट नै पन बिजली परियोजनाएं लेई इक्विटी सहायोग दे रूपे च देने लेई बी बकखरे फंड रक्खे न। एहदे अलावा झेलम तवी हाड़ सुधार परियोजना जे.टी.एफ.आर.पी तैहत खर्चे लेई 500 करोड़ रपे दी रकम बी दिती ऐ। केंद्र शासित प्रदेश दिएं ांचागत परियोजनाएं लेई संसाधनें दी बित्थ पूर्ति लेई 101 करोड़ 77 लकख रपे दी रकम रक्खी गेदी ऐ। एहदे अलावा जम्मू-कश्मीर पुलस लेई खासतौर पर 9 जहार 789 करोड़ 42 लकख रपे रकम बकख रक्खी गई ऐ। केंद्र सरकारै जम्मू-कश्मीर गी तनखाह, पिंशन ते होरनें खर्चे लेई पैहा उपलब्ध कराना मन्नी लैता ऐ जेदे च सलाना बजट च 12 जहार करोड़ रपे दी रकम बकखी रक्खी गेदी ऐ।

<><><><><><>

LG J&K Budget

उपराज्यपाल मनोज सिन्हा होरें 2024-25 बरे लेई इक दूरे दी सोच रक्खिए तैयार कीते गेदे बजट लेई प्रधानमंत्री नरेंद्र मोदी ते केंद्री खजाना मंत्री निर्मला सीतारमण हुंदा आभार प्रगट कीता ऐ। एल.जी होरें आखेआ जे एह बजट आर्थिक विकास गी होर रफ्तार देग, विकसित भारत बनाने लेई दूरे तोड़ी दे सुधार आहन्नोग ते कम्म कारोबार करना आसान बनाग ते कन्नै लोकें दे जीवन स्तरै गी उबड़ा चुक्कने च बी मता कारी दा साबत होग। उपराज्यपाल होरें इस बजट पर अपनी प्रतिक्रिया दिंदे होई आखेआ जे बजट दी इक बड़ी खरी गल्ल एह ऐ जे एहदे च

रोजगार, हुनर विकास, लौहके, भलेयां लौहके ते दरम्याने दर्जे दे उद्यमें गी बढ़ावा ते समाज दे मध्यमवर्ग दे लोकें दा खास ध्यान रक्खेया गेदा ऐ ते बजट दी मंशा समाज दे सब्बनें वर्गे दे लोकें दे सशक्तिकरण दे सुखने गी मूर्त रूप देना ऐ।

<><><><><><>

JK Budget Returns

जम्मू-कश्मीर च समाज दे बक्ख-बक्ख वर्गे दे लोकें 2024-25 दे केंद्री बजट दा सौआगत कीता ऐ। लोकें दा आखना ऐ जे इस बजट च सब्बनें वर्गे दा खयाल रक्खेआ गेदा ऐ ते नौजवानें गी सिखलाइ

र् लैने दा मौका ते 5 जहार रपेय म्हीना स्टाइपन दे रूपै च थहोने कन्ने उनेंगी अपना भविकख सोआरने च बड़ी मदद थहोग। आकाशवाणी समाचार जम्मू कन्ने गल्ल करदे होई जम्मू युनिवर्सिटी दे साबका वाइस चांसलर प्रो. आर.डी शर्मा होरें आखेआ।

स्थाड़े जम्मू संवाददाता नै वरिष्ठ पत्रकार सोहेल काजमी हुंदे कोला बजट बारे उंदी प्रतिक्रिया पुच्छियां तां उंदा आखना हा।

बक्ख-बक्ख जिलें च मजूद स्थाड़े संवाददाताएं बी मकामी लोकें कोलां इस बजट बारे उंदी प्रतिक्रिया हासिल कीतियां।

<><><><><><>

SC-NEET

सुप्रीम कोर्ट नै नीट-यूजी इम्तेहान 2024 गी रद्द करने ते परतिए इम्तेहान कराने दे आदेश देने थवां इंकार करी दिता ऐ। एहदे कन्नै गै मुख्य भरै च सरकारी ते निजी मेडिकल कालजें च प्रवेश आस्तै अज्जै थवां कांसलिंग दी प्रक्रिया शुरू करने लेई बत्त पदरी होई गई ऐ। भारत दे प्रधान न्यायाधीश डी.वाई चंद्रचूड़ हुंदी अध्यक्षता आली 3 जजें दी पीठ नै आखेआ जे उपलब्ध सबूत कोशन पेपर दे तरीकेबद्द ंगगै सिर लीक होने दी सारत नेई दिंदे न ते 5 मई गी आयोजित परीक्षा दी वैद्यता पर कोई माड़ा असर नेई पौंदा। पीठ नै आखेआ ऐ जे स्हाड़ा एह मनना ऐ जे उपलब्ध सबूतें दे आधार पर नीट यू.जी 2024 परीक्षा गी रद्द करना बे-न्याई होग। पीठ नै आखेआ जे मौजूदा बरे आस्तै परीक्षा रद्द करने कन्नै 20 लक्ख थवां मते विद्यार्थिं आस्तै मुश्कल होग ते अगड़े प्रवेश सरबंधी कार्यक्रम च रूकावट औग।

<><><><><><>

LG-Samadhaan

उपराज्यपाल मनोज सिन्हा होरें श्रीनगर च कल जेके समाधान पोर्टल दी शुरूआत कीती जेहड़ा शकैतें दे नबेड़े ते निगरानी रखने बारे इक्क एकीकृत बवस्था ऐ। जम्मू-कश्मीर दे लोकें लेई एहदी शुरूआत करदे मौके उनेंआखेआ जे एहदी मदद कन्नै हर मसले दे नबेड़े गी यकीनी बनाने ते ओदे पर नेइमी तक्क रखने च सखाल होग।

<><><><><><>

R-Day

जम्मू दे डिविजनल कश्मिश्नर रमेश कुमार ते जम्मू पुलस दे अडिशनल डरैक्टर जनरल आनंद जैन होरें जम्मू खित्ते च ओंदी आजादी दे ध्याड़े लेई कीती जा रदी तैयारिएं दा कल जायजा लैता। इस सरबंधे च लाई गेदी बैठका च डिविजनल कमिशनर होरें दस्तें दी रिहर्सल बेल्ले सिर शुरू करने दे निर्देश दिते। उनें इक सांझा नियंत्रण कक्ष खडेरने ते नोडल अफसरें दी नियुक्तिएं लेई आखेआ ते कन्नै डिप्टी कमिशनरें गी निर्देश दिता जे सब्बनें बंदोबस्तें गी बेल्ले सिर सबूरा करोआना यकीनी बनान। एहदे अलावा उनें पैहली थमां 14 अगस्त तगर स्वच्छता पखवाड़े दे आयोजन लेई बी हिदायतां जारी कीतिआं। अडिशनल डीजीपी होरें SSP-एं गी निर्देश दिते जे ओह सुरक्षा दे निग्गर बंदोबस्त यकीनी बनान।

<><><><><><>

Soldier

पुंछ जिले च कल फौज नै कब्जा रेखा पर घुसपैठ दी इक कोशश गी नाकाम बनाई दिता। इस दौरान होई दी गोलीबारी च इक सैनिक शहीद होआ ऐ। कृष्णा घाटी दे बट्टल सैक्टर च होए दे इस टाक्करे दरान लांस नाईक सुभाष कुमार गंभीर तौर पर जख्मी होई गे हे। तोआई कुपवाड़ा जिले दे लोलाब हेठ पौंदे त्रिकुखा टॉप लाहकें च होए दे टाक्करे परेंत उत्थे सुरक्षाबलें दा तपाशी अभियान जारी ऐ। होर ब्यौरे गी बलगेआ जा'रदा ऐ।

<><><><><><>

Amarnath Yatra

जम्मू दे भगवती नगर आले आधार शिविर थवां 2 जहार 907 श्रद्धालुएं दा इक होर जत्था अज्ज बड्डलै श्री अमरनाथ जी दी जातरा लेई रवाना होआ। एह श्रद्धालु 103 गड्डिएं दे काफिले च सौआर होइए घाटी लेई रवाना होए। इस जत्थे च 2 जहार 194 मर्द, 598 महिलां, 11 बच्चे, 11 साधु ते 13 साध्वियां शामिल हियां। कुल 2 जहार 907 श्रद्धालुएं चा 1 जहार 134 श्रद्धालु बालटाल लेई ते 1 जहार 773 श्रद्धालु पहलगाम लेई रवाना होए जित्थुआं ओह अपनी अग्गे दी जातरा शुरू करडन।

<><><><><><>

Dismiss

जम्मू-कश्मीर सरकारै राष्ट्र विरोधी गतिविधिएं च मलव्वस होने दे दोश च पुलस दे दऊं कांस्टेबलें सने कुल 4 सरकारी मलाजमें गी नौकरी शा बर्खास्त करी दिता ऐ। पुलस दे दऊं कांस्टेबलें दे अलावा जेहड़े होरनें दऊं मलाजमें गी बर्खास्त कीता गेआ ऐ, उंदे चा इक स्कूली शिक्षा विभाग च बतौर जूनियर असिस्टेंट ते दुआ ग्रामीण विकास ते पंचैती राज विभाग च बतौर विलेज लैवल वर्कर कम्म करै करदा हा। इंदी पंछान त्राल थमां कांस्टेबल इम्तियाज अहमद लोन, हंदवाड़ा दे बसनीक मुश्ताक अहमद पीर, कुपवाड़ा दे बसनीक जूनियर असिस्टेंट बाजिल अहमद मीर ते उड़ी बारामूला दे बसनीक विलेज लैवल वर्कर मोहम्मद जायद शाह दे तौर पर कीती गई ऐ।

<><><><><><>

School-Timing

जम्मू दे स्कूली शिक्षा सरबन्धी निदेशालय नै जम्मू संभाग दे सोए आले जोन च हायर सेकेंडरी सतह तोहड़ी दे सब्बनें सरकारी ते मान्यता हासिल निजी स्कूलें च पढ़ाई दे समें च बदलाव करिये इसी बड्डलै 8 बजे थमां दपैहरी 1 बजे तगर करी दिता ऐ। इक अधिसूचना च निदेशालय नै आखेआ ऐ जे एह फैसला खिते च जबरदस्त गर्मी दे मद्देनजर लैता गेआ ऐ ते एह हुकम औंदी 10 अगस्त तगर लागू होग।

<><><><><><>

J&K SMVDSB

श्री माता वैष्णो देवी श्राइन बोर्ड नै त्रिकुटा पहाड़िं पर सैलतन बधाने लेई ड्रोन आधारित इक खास किस्में दी 'हरित पैहल' रम्भी ऐ। आकाशवाणी दे जम्मू संवादाता मुजब इस अनौखी पैहलकदमी तैहत पर्यावरण दी सांभ-संभाल ते टिकाऊ विकास लेई भलेयां अज्जै-कल्लै दिं तकनीकें दा इस्तेमाल कीता जा'रदा ऐ तां जे श्री माता वैष्णो देवी जी दे पवित्तर तीर्थ स्थान दे आले-दोआले दे कुदरती छलैपे गी बरकरार रक्खेआ जाई सकै। श्राइन बोर्ड दे प्रधान लेफ्टिनेंट गवर्नर मनोज सिन्हा होरें बीएं दी बंड आली प्रणालिं लेई ड्रोन तकनीकें गी इस्तेमाल च आह्नने दे दे निर्देश दिते दे न जेदे राहें त्रिकुटा पहाड़िं दे उच्चे ते दूर-दरेडे लाहकें गी कवर कीता जाई सकै।

<><><><><><>

Asia Cup

महिला एशिया कप क्रिकेट च भारत नै सेमीफाइनल च अपनी थाहर पक्की करी लेती। भारत नै श्रीलंका दे दम्बुला च खेड्गे गेदे मैच च नेपाल गी 82 रन्जें कन्ने हराया। 179 रन दे लक्ष्य दा पिच्छा करदे होई नेपाल दी टीम 20 ओवरें च 96 रन्ज बनाई सकी। भारत लेई

दीप्ती शर्मा नै त्रै विकेटां लैतियां जिसले कि राधा यादव ते अरुंदिति रेड्डी नै 2-2 विकेटां लैतियां। एहदे थवां पैहले बल्लेबाजी करदे होई भारत दी सलामी बल्लेबाज शैफाली वर्मा नै 81 रन बनाए। उनेंगी “प्लेयर ऑफ दा मैच” घोषित कीता गेआ। ग्रुप-ए च भारत ते पाकिस्तान नै सेमीफाइनल च थाहर बनाई लैती दी ऐ।

<><><><><><>